

欽定剿平三省邪匪方略

正編

九

五

卷之四

四

四



欽定剿平三省邪匪方略正編卷二百十八

庚申年

十一月二十三日

辛丑

倭什布奏言查高馬等逆

大股賊衆並高家營小股賊匪均經臣同明亮

先後剿敗逼回陝境探得尙在洵陽白河一帶

毗連楚省地方往來滋擾希圖乘間折回額勒

登保帶領大兵由關隘至竹谿向東北抄道兜

擊恐該匪被剿情急必由西北一帶狂奔查二

竹西北邊界兵力稍單臣卽於銅錢關一帶扼

要堵截一面派侍衛塔津保副將吉林泰等帶

領馬步官兵一千餘名由七里關跟剿小股賊

匪並據哨探報稱高家營小股賊衆竄至關兒

口逼近竹谿界內經臣先派塔津保吉林泰等

趕至關廟河正值該匪折轉竄來我兵向前衝

撲賊匪卽四散奔逃出柳樹溝大柈子溝小柈



子溝三路逃遁該侍衛等帶兵追殺十餘里沿  
途殺賊一百餘名生擒二十六名內有執旗賊  
目滕臣中鄧二珍等二名訊稱高家營高二掌  
櫃今日本欲與高二馬五合夥下湖北省去不  
料被官兵截殺東奔西散當將該二犯卽行轡  
割其餘二十四名亦係正賊槩行正法適接額  
勒登保來咨囑明亮帶兵由七里關向東而進

並會同臣轉飭鎮臣孫清元來營帶兵臣與明

亮商酌塔津保吉林泰所帶官兵未免稍單明

亮卽於初三日帶領馬步官兵千餘名由大廟

接續前進沿途擒殺賊匪蔣其貴等六十餘名

陸續解送前來訊稱高三馬五賊匪竄至白河

屬茅坪高家營賊匪竄入秦家坪至水坪晝夜

狂奔復接明亮來信已與塔津保吉林泰至得



勝鋪合營由竹谿攔剿高馬大股賊衆臣飛卽

帶兵由伍家壩一帶抄覓捷徑星夜兼程尋蹤

躡剿詎該匪狡譎異常其大隊賊衆由白雞埡

竄出官渡河復分一股晝伏夜行零星散竄至

大峯寺李家河一帶焚掠臣飛派副將朱士奉

協領武成額等乘夜帶領馬步官兵趕至大小

西河搜剿殲斃賊匪數十餘名擒獲吳慎朝等



四十九名並獲騾馬旗幟鎗矛等件訊據吳慎朝供係執旗賊目並稱高家營賊匪是高二掌櫃帶領原有一千五六百人前在草場壩一路被官兵殺死數百人高二掌櫃想要到高三馬五大營合夥又被官兵截斷現在大家商量後面官兵追殺緊急只可向無兵地方躲避令我帶一百餘人前來到處放火引誘官兵追入山

內他們就可向村莊擄掠餘無要供並訊各匪

等均係罪大惡極當卽一併正法查高家營一

股賊匪人數雖少均係精壯矛手積年猾賊其

攜帶婦女幼孩無多是以翻山遁逃日行一二

百里狂奔折竄情形尤爲可恨偵探該匪去路

已至袁杜坪有奔竄歐家店歇馬河之勢

臣

若

從上龕一路追剿恐轉迫賊匪東向若我兵抄



道迎截又慮賊匪由馬攔大黃溝折竄房保轉

爲非計是以

臣

飛飭孫清元帶領馬步兵勇四

千餘名星夜趕赴保康迎頭截擊

臣

卽由獅子

岩黃龍堰向青峯跟躡兜剿杜其北竄蔓延並

接長齡明亮來信現奉經畧飭令帶兵前來協

剿

臣

將一切情形隨時咨會以期合攻夾擊再

查鄖西邊界

臣

節次飛飭道員恒慶遊擊周龍

章都司鄒宗夔知縣孔繼榘等撥派兵勇分路  
防堵茲據恒慶稟稱探得賊匪由西鄉瓦溪溝  
搶過江北七里壩出松樹溝奔竄大路有欲東  
趨之勢又探得西鄉牛羊河賊匪翻饒峯嶺進  
蒲溪河一帶查蒲溪河東通銀杏壩西通展龍  
垵北通猫兒嶺均距鄖西不遠臣復飛飭恒慶  
等督率文武員弁厚集練勇實力堵禦查鎮臣



德昌在黃龍灘帶兵堵禦此時陝省洵陽白河  
境內賊蹤漸遠該處防守暫可從緩已照會該  
鎮如遇賊匪竄近鄖西邊境卽帶兵就近渡江  
趕赴該處協同堵剿聲勢較壯自無虞其闌入

奏入

上命軍機大臣傳諭姜晟倭什布曰昨據額勒登保  
奏高家營分股賊匪潛匿楚境山內經大兵截剿



該匪由竹山竄入房縣獐洛河一帶未據姜晟等  
奏報正深慮念今據倭什布奏高家營分股賊匪  
竄至關兒口逼近竹谿經塔津保等向前衝撲殺  
賊一百六十餘名其高馬大股賊衆經明亮等在  
竹谿一帶堵截該逆等分出一股賊匪零星分竄  
李家河等處復經倭什布派令副將朱士奉等趕  
往搜剿殲擒淨盡所辦尙好高家營一股賊匪卽

係首逆高二輾轉竄擾經年屢次戕害大員最爲  
兇惡可恨現在倭什布已飭孫清元趕赴保康迎  
擊倭什布亦跟蹤兜截又有長齡明亮帶兵協擊  
務須同心併力將此股賊匪卽在竹谿一帶乘勢  
剿淨其首逆高二一經擒獲殲斃卽遵照節降諭  
旨將其首級致祭前此被害大員以慰忠魂而伸  
衆憤但倭什布等必須將此股竄匪剿捕淨盡方



爲伊等之功不得僅將首逆殲除仍留餘孽或又  
蔓延他處也至鄖西邊界倭什布雖已飭令道員  
恒慶等分段防堵但西鄉賊匪有欲東趨之勢而  
徐添德高三馬五及龍苟等股賊匪俱在安康一  
帶川陝接壤之處奔竄經畧額勒登保已過漢江  
北岸統兵追擊各股賊匪聞知此信難保其不又  
思竄入楚境姜晟倭什布務督飭文武員弁實力

防堵勿令一名闖入其高家營一股賊匪尤應速  
行剿淨庶可專心辦理堵禦事宜不致顧此失彼  
也

上又命軍機大臣傳諭湖廣總督書麟日前已有旨  
將書麟調任湖廣總督並令馳驛速赴湖北接印  
任事此時應已在途昨據經畧額勒登保有高家  
營分股賊匪由竹山竄入房縣之奏本日倭什布



奏高家營小股竄近竹谿卽係此股賊匪高家營  
賊首係屬高二在諸賊中最爲兇狡可惡此時分  
股竄入楚境人數不多已降旨諭令姜晟倭什布  
實力堵剿務在楚境殲除淨盡而長齡明亮現已  
帶兵馳往自可將此股兇逆速就殄平惟是陝境  
竄匪如徐添德高三馬五及龍紹周苟文明等股  
俱在漢江南岸逼近楚省額勒登保現已督兵至



漢江北岸剽賊恐陝境賊匪乘間竄楚該省防堵  
尤關緊要姜晟年老於軍務未能諳悉書麟曾出  
師金川上年辦理滇省猥黑亦甚妥協戎行素所  
經歷著途次接奉此旨由驛兼程行走不必前赴  
湖北省城卽速赴竹谿一帶軍營會同倭什布督  
率辦理將剿堵事宜悉心籌畫務臻妥善以副委

任

同日

上命軍機大臣傳諭伯麟長麟陸有仁曰昨因湖北需用餉銀已降旨姜晟倭什布令於廣東省解陝餉銀五十萬兩過境時截留二十萬兩其陝省短少餉銀二十萬兩之處尙須籌撥足數今晉省庫貯銀兩既屬寬裕著傳諭伯麟卽就近再撥銀二十萬兩派委委員迅速解陝交陸有仁湊足前次



五十萬兩之數至此項銀兩起解後如可無須撥  
還著卽據實具奏倘晉省尙有別項支放不敷之  
處亦卽速行奏明再由部庫撥往該省歸欸

二十五日癸卯長齡奏言竊臣前於陝省白河之

東西壩追剿高馬二逆正擬乘勝剿除又據探  
報川陝各股匪徒俱向東趨並知經畧額勒登  
保由竹谿繞道前來兜剿於十月二十九日在

得勝坡迎晤當經派臣由吉陽關抄出白河屬

之順水寺先於東面遏截賊竄鮑家店之路嗣

緣初三日額勒登保督率大兵從茅坪至棗樹

嶺迎剿大獲勝仗該匪肆竄狂奔復奉札令臣

肅清後路沿途搜捕日有俘戮於初十日旋至

白土關復與額勒登保見面探知高二一股又

已折竄楚境該匪素稱狡悍跟隨俱係精壯矛



手雖有倭什布明亮跟追仍令臣迅馳前往幫

辦臣卽於十一日趕至竹谿縣城適值明亮自

七里關一帶逼剿竄匪邊隅業已寧靜帶兵回

至竹谿正擬踰路進剿臣原帶吉林黑龍江馬

隊官兵除額勒登保撥調外現止有五百餘名

竹谿一帶不可無兵防守因將原帶兩粵兵一

千名馬隊一百餘名派委副叅領魁德定住部



委叅領卓爾渾保副將樊雄楚留於竹谿防堵

臣帶領馬隊三百餘名卽與明亮歸併一路於

十二日由竹山界嶺行抵房縣陳家舖等處接

據探報倭什布在大小西河一帶沿途截剿頗

有殲獲卽由房縣之獅子岩黃龍堰抄赴保康

之青峯攔截東趨之路臣等揣度賊情該匪旣

知東面有兵必向南竄臣於十五日率兵疾走

趕至柏木坪正值該匪於各村莊肆行焚掠當  
與明亮熟商賊匪散漫山徑分歧必得四面圍  
裹逼歸一處以期得手當派侍衛恒崑喜常阿

皂祿等各領馬隊分爲四路由各山溝蹠探前  
進又派叅將吉林泰雙福等帶領步兵搶上山

梁覓徑搜捕

臣

會同明亮督率兵勇分路競進

該匪見有官兵精悍矛手齊上山坡拚命迎拒



我兵數路壓擊立殲一百餘名擒獲吳登科等  
二十一各該匪情急俱向老林深竄復派兵勇  
尋蹤擊追殺斃四五十名餘匪不擇路徑翻山  
越嶺仍向南奔逃當將獲犯吳登科等訊供據  
稱高馬二掌櫃前在鮑家店陳家莊益水等處  
屢被官兵殺敗原想逃回陝省途次遇見徐添  
德王廷詔賈文謨樊希孟各股因大兵趕來俱

向東奔只得一同折回行至確兒口關廟河又  
遇官兵攔截各自覓路逃命高掌櫃計議官兵

必向西北追趕大股我等由山僻小路竄入竹

山如果東面無阻可圖下竄覓食倘不能下去

暫由興山巴東一帶逃往四川躲避我等俱是

戰手久隨高掌櫃打仗等語實係正賊當卽正

法臣乘此賊匪窮蹙惟有繫躡追蹤以期一鼓



殲除一面星飛知會倭什布兜剝前來俾免蔓  
延所有軍營出力人員謹遵

旨查明開單呈

覽奏入

上命軍機大臣傳諭長齡曰此次長齡探知高一  
股折竄楚境由竹山房縣一帶踰徑抄截行抵柏  
木坪地方正值該匪等在各村莊肆行焚掠派兵

四面圍裹分路競進立時殲斃精壯矛手一百餘  
名所辦尚好高二一股自春間那彥成在甘境未  
經剿淨遺孽至今現經官兵剿殺人數無多但該  
犯最爲狡悍長齡務須與明亮同心併力乘其窮  
蹙之時卽在房竹一帶殲戮淨盡不得僅以驅出  
楚境遂爲完事徐添德及高三馬五龍紹周等逆  
俱在漢江南岸奔竄此時川省築堡團練防禦嚴



密旨不敢竄往川境而經畧額勒登保現已督兵  
至漢江北岸剿賊該匪等聞知此信必仍思合夥  
竄楚其湖北邊界一帶防堵事宜尤關緊要長齡  
務須會同姜晟倭什布等督率將弁於扼要處所  
實力堵禦毋使一名闖入倘稍有疎懈又致賊匪  
乘間竄入楚境長齡等不能當其咎也

諭內閣曰長齡奏軍營出力人員內三等待衛呢

瑪善委前鋒侍衛特依順保委叅領喜常阿佐領  
徹布登俱著加恩陞一等補用叅將雙福佐領觀  
成委叅領阿穆昌阿佐領忠福俱著加恩賞戴花  
翎守備羅綸著加恩賞換花翎馬甲雙喜青山鄉  
勇首領從九品陳用梁俱著加恩賞戴藍翎千總  
頂戴外委劉得明著加恩以千總卽用外委曹正  
榮著加恩以把總卽用候補知州魏耀亦著加恩



賞換花翎以示鼓勵

二十六日

辰

長麟慶成奏言竊

臣

長麟因李裁

縫阮正滌等賊匪雖經逼剿出境尚在邊界老

林遊奕各路卡隘每日均有搜獲餘匪或三五

名或十數名不等竊計寧羌沔縣褒城南鄭各

邊界綿長四百餘里賊匪現在分投窺伺誠恐

有顧此失彼之虞是以

臣

仍在黃官嶺一帶居

中策應旋據寧羌州稟報川匪一股約三千餘  
人由廣元李家壩麥子坪一帶北奔有竄入陝  
境之勢提督七十五由廣元追剿前來又據報

稱賊匪一股約千餘人由廣元兩河口竄入卦

子山一帶滋擾各等語臣長麟當即派令革職

副都統防禦銜和興額叅將張應魁羅全亮等  
帶領馬步兵勇馳赴寧羌一帶堵截並派遊擊



常祿劉滿貴等帶領兵勇趕往與總兵楊奎猷  
分路防守鋼廠鐵鎖關一帶並飛札遊擊王興  
朝守備李懷玉等分帶兵勇商同寧羌州知州  
馮裕定在於南棧大路左近擇要嚴防以杜賊  
匪西竄甘省之路嗣據稟報廣元竄來之賊於  
初十日竄至七里壩後河一帶距寧羌州城僅  
十里經守城鄉勇施放鎗礮賊匪不敢由城

下西奔卽於是夜三更徙向荷葉嶺潛竄直趨黃壩驛大路欲奔甘省時守備李懷玉帶兵先至荷葉嶺扼住要隘賊匪直來攻撲卡隘軍功首領張廷魁率領鄉勇迎敵身受鎗傷經李懷玉鼓勵兵勇鎗礮並施擊斃賊匪數人生擒矛手胡廷義等三名賊匪當仍由猪槽溝麥子坪一帶折回廣元境內其卦子山賊匪經和興額



張應魁羅全亮等帶兵趕往迎擊該匪聞風隨  
卽折回由三道河流沙坡一帶竄往川境一路

臣

長麟恐該匪仍圖伺隙西竄南棧大路一帶

祇有李懷玉一路兵勇數百名尙覺稍單復飭  
令和興額等卽帶兵趕赴南棧督同堵禦適又  
據白巖河卡勇報稱前次截回李阮等賊夥翻  
大林坡西奔經遊擊王興朝在流沙坡將該匪

截回復由大林坡犁坪一帶竄入紙房壩屯聚  
距白巖河卡隘僅四十里等語臣長麟卽派副  
將蕭福祿等帶領兵勇冒雪趕至白巖河正遇  
賊探數騎駛奔前來蕭福祿率領馬兵數人疾  
馳迎往射中賊匪一人落馬就擒餘匪俱各奔  
回訊據擒獲賊探供稱賊夥已由紙房壩起營  
前來距此不遠蕭福祿等隨將賊探截斃立卽



催兵直前迎剿詎該匪知有官兵前來星飛折

回鑽入老林藏匿天晚雪深未便搜捕

臣長麟

現仍督率各卡兵勇加意防範不致賊匪深入  
至恒瑞一路因連日拏獲賊匪訊知鮮苟等逆  
賊股由馬家壩向小蒙壩西奔當派副將永明  
等帶兵前往龍池場迎擊恒瑞亦趕赴白雄觀  
接應沿途拏獲放火掠食之賊李雲等二十三

名均卽正法該匪等復繞向瓦石坪一路奔逃  
恒瑞卽趕至天池寺扼要堵截並飛飭各卡隘  
官兵晝夜嚴密防堵該匪等未能竄至西北復

向東南折奔

臣

慶成自回西鄉板橈埡策應防

堵後節次探知苟鮮等股由馬家壩折竄麻柳  
壩一帶又龍紹周一股賊匪由紫陽鐵板溪闌  
入西鄉境內又伍逆前股之曾芝秀賊匪復折



向西鄉東路逃竄均經督率兵勇或扼要堵截  
或迎前擊剿各有斬獲俱將匪衆力截回川至  
本月初十日據駐劄東路總兵胡定泰探報冉  
添元樊人傑等餘匪約有二三千人由紫陽向  
石泉之銅車壩一帶狂奔距江岸不遠該鎮恐  
賊匪仍尋冉逆前蹤搶渡卽帶兵抄至白沔峽  
先截瓦脊溝一帶淺灘之路臣慶成聞信親帶

兵勇卽於是夜三更馳往接應丑刻趕過白沔  
峽探知賊匪在大紅石地方乘月夜踣淺偷渡

經關騰施放鎗礮轟擊該匪退回復前繞上游

十餘里之茶鎮地方馬賊先經淌過北岸衝突

防江兵卡都司張萬寧帶兵二百餘名奮力抵

禦寡不敵衆受傷陣亡傷亡兵丁三十餘名餘

匪俱各紛紛搶渡

臣

慶成卽先帶馬隊馳抵茶



鎮正遇該匪蜂擁搶渡兵勇尙未趕至

臣

慶成

先率馬上弁兵往來剿散胡定泰亦帶步兵趕  
來併力殲擒先後斃賊二百餘人生擒六十餘  
名及淌至中流身被鎗箭撲水淹斃者約數百  
人逃出被裹難民尤多搶獲旗幟刀矛騾馬無  
數其先已過江逃逸者尙有千餘人

臣

慶成當

令胡定泰將原帶官兵二千餘名鄉勇四百餘

名卽日過江繫躡追剿毋使蔓延此次賊匪由  
茶鎮過江係總兵關騰所管汎地該鎮未能隨  
時策應致有踈失相應據實叅奏請將總兵關  
騰革職現在賊匪肆竄無人更替仍留該叅員

暫在江岸防堵以觀後效再有踈虞加倍治罪  
至前次過江之冉學勝一股賊匪經綸布春汪  
啟等自老關口一帶逼截該匪卽由城固之龍



清石一帶西奔直趨留壩江口綸布春汪啟奮  
力追擊於十三日黎明馳抵玉皇廟趕上賊蹤  
賊匪搶上山梁分爲三路抵拒綸布春帶領馬  
步兵勇由胡麻溝一擁齊上汪啟帶領官兵由  
右手山梁抄殺副將玉福等帶領兵勇由左手  
山梁抄殺賊匪抵敵不住登時潰散官兵乘勢  
追壓殲斃賊匪五百餘人生擒二百餘名內有

新近被裹難民八十餘人訊明釋放其餘均係  
戰手槩行正法餘匪俱由土地埡四散奔逃已  
經竄至廢邱關酒店溝一帶綸布春等趕至廢  
邱關截擊該匪復分股折回江口奔竄有仍行  
入山之勢至伍懷志一股餘匪經穆克登布桑  
吉斯塔爾連日轟擊該匪遁入三岔路峽內穆  
克登布等步行帶兵入峽追捕該匪聞信卽翻



上大山極頂穆克登布等激勵兵勇向上仰攻  
我兵久被牽制人人憤恨當卽奮力搶上山頂  
立斃賊匪四十餘人生擒七名該匪情急四竄  
兵勇分投追逐又斃賊二十餘人餘匪僅二百  
數十人復由老林向核桃壩一帶奔逸適再學  
勝股匪由東南竄來分出矛手四五百人與伍  
逆合夥穆克登布與桑吉斯塔爾仍分兵兩面

抄剿餘孽究屬無多可期搜撲淨盡

同日陸有仁奏言竊臣連日探得褒沔邊界之

賊因各卡俱有兵勇堵截漸已南趨惟接據寧

羌州稟報有賊匪一股攻撲該縣荷葉嶺卡隘

經鄉勇義首張廷魁率勇堵禦右腿帶傷守備

李懷玉帶兵接應殲賊數人賊匪折回麥子坪

與另股川匪竄合又西鄉縣稟報賊匪焚人傑



冉添元等約有三千餘人初十日至茶鎮衝撲  
都司徐景寧營卡並將遊擊王瑄卡兵衝散賊  
匪馬隊先行過江步賊正在晒渡經慶成帶兵  
趕上奮力截擊共斃賊二三百名生擒六十餘  
名慶成卽派總兵胡定泰過江追剿日下西鄉  
之下楮河馬家壩小蒙壩一帶尚有賊匪奔竄  
慶成九十在峽口一帶堵禦叅贊德楞泰提督

賽冲阿由太平馳入陝境分投截剿又洋縣稟  
報伍懷志零股賊匪由該縣椒溪河往寧陝廳  
一路奔竄總兵穆克登布緊躡追剿又留壩廳  
稟報賊匪冉學勝一股由洋縣平洛河竄至廳  
屬江口擾及棧道高椿舖松林驛大路綸布春  
汪啟帶兵由廟臺子一帶繞截現在文報以及  
糧餉軍火均暫爲停運又據白河洵陽安康等



縣稟報東路徐添德高二馬五等股賊匪經楊  
遇春慶溥溫承惠帶兵節次剿殺並遇經畧大  
兵截擊勢已分散現在竄至安康嵐河西牛蹄  
嶺一帶滋擾經畧及楊遇春官兵緊躡追剿

臣

詳核各路情形惟南山以內已有賊匪三股且  
西鄉石泉一帶尚有後來窺伺江岸之賊情形  
較爲著重此時德楞泰等大兵已入陝境兵數

益增糧餉更關緊要查江西協撥之米因白河  
洶陽沿江一帶水淺船少且時有賊匪出沒尙  
未能迅速挽抵興安臣已節次專員馳往催儻

並飛傳山東江西二省解員將奉撥餉銀兼程  
趕解臣仍一面竭力設法籌辦務俾各路源源  
接濟以期不致缺乏

長麟陸有仁又奏言臣等伏查投首難民被脅



有人暫之分則安頓亦須區別如各處寄居貿易及肩挑步担隨地營生者猝遇賊來被裹旋卽乘間逃出此等暫時被脅之人受累尙輕其原有產業並未損動投首後只須酌給路票盤費卽可各自寧家毋庸另籌安插惟向來落業之戶賊至裹去房屋被其焚燬資產爲之一空不得已苟且偷生隨賊往來奔竄此等愚民推

原其心初非甘於從逆祇以爲日旣久一經逃  
出誠恐爲兵勇所不容卽已知

湯網宏開予之生路而投出後謀生無術亦必饑寒  
交迫以致疑懼不前此脅從者之所以尙未全  
散也現在各路官兵連獲勝仗剿剩餘匪已如  
阱獸釜魚趁此機會宣布

皇上如天好生之德俾脅從者相率歸誠誠爲事半



功倍但思此等被脅之人習染已久若投首後  
不爲熟籌長久資生之計必又去而從賊萌蘖  
仍屬未盡自必須給予恒產方足以固其恒心

前奉

諭旨飭令清查叛產以備安頓難民曾經前撫臣台  
布派令道員楊護查辦嗣經畧額勒登保在甘  
時與臣長麟面商因各處清查事多窒碍是以

僅將著名首逆龐洪勝叛產清查其餘俱請從

緩今<sub>臣</sub>等詳查卷案陝西叛案尚有元年剿辦

完竣之白河安康紫陽等處賊匪首逆多名均

係彰明較著其叛產可以清查備撥又此外如

實在全家被害無人承業現爲親鄰侵佔之產

以及南山客民開墾試種尙未升科旋因賊近

拋荒之地俱可確切查勘以備安插之用<sub>臣</sub>等



面爲籌酌意見相同此後投首無歸之人擬卽  
以前項產業均勻分給並未經承種之先酌量  
捐給籽種口糧以資養贍倘尙不敷安頓並可  
令其承充在官丁壯夫役藉以羈縻約束總令  
各遂所生毋許胥役人等稍有滋擾以上會籌  
情形臣長麟因正在帶兵堵剿臣陸有仁卽一  
面飭屬清查並刊刻詳明告示於賊匪經過之

地偏處張貼愷切曉諭以期賊勢益孤大功速  
歲至於著名各首逆如有逃匿者自當嚴密搜  
擊斷不任其漏網均奏入

上命軍機大臣傳諭額勒登保長麟陸有仁曰昨額  
勒登保奏據石泉令稟稱有一股賊匪由西鄉漁

壩街過江額勒登保以江北爲重率同扎克塔爾

楊遇春渡過江北迎頭截剿極力辦理其情詞甚



爲激切額勒登保自因賊匪過江恐致散漫且不  
知此股係何首逆賊數究有若干不免過於焦急  
朕亦恐此股賊匪延及漢江以北陝省東路又致  
著重正深懸念今長麟慶成報到情形其由川省  
竄至七里壩後河一帶賊匪欲奔往甘省經長麟  
派員截住仍竄回川所有李冉苟鮮龍紹周曾芝  
秀各匪亦經長麟恒瑞慶成等督率兵勇或扼要

堵截或迎前擊剿各有斬獲將匪衆力截回川所  
辦甚好並據奏明前此由漁壩街過江之賊係冉  
添元樊人傑等匪約有二三千人經慶成率同胡  
定泰帶兵追趕殲擒二百六十餘名淹斃數百人  
過江逃逸者祇有千餘人慶成已令胡定泰過江  
追剿現在冉學勝一股復經綸布春汪啟等截擊  
殲擒七百餘名而伍懷志一股所剩僅二百數十



人節與冉學勝合夥亦止六七百人再合之冉添  
元樊人傑賊股亦不過二千餘人陝省漢江北岸  
官兵本有萬餘額勒登保又率同札克塔爾楊遇  
春等帶兵過江慶成又派胡定泰帶兵二千餘名  
鄉勇四百餘名協同剿辦軍威更覺壯盛以幾及  
兩萬兵力剿此二三千敗竄賊匪又有綸布春桑  
吉斯塔爾穆克登布等協同剿辦自能即日殲淨

漢江以北可期一律肅清額勒登保轉不必過於  
焦急惟川省賊匪刻思竄至陝界雖經長麟等截  
回尚在川陝接壤之處游奕且高馬二逆最爲狡

悍聞知額勒登保業已過江必又思從陝竄往楚  
境現據倭什布等奏徐添德一股已由尚家壩竄  
赴八角廟勢在東趨漸近楚境果不出朕之所料  
看來慶溥溫承惠在陝剿辦祇能帶兵防堵究不



能躡蹤追擊以致賊匪復又乘間東趨而額勒登保前此移兵江北未免輕率冒昧以目前情形而論漢江北岸賊匪尙易剿辦而南岸轉爲著重額勒登保當察看情形將北岸竄匪剿殺得有勝仗或交綸布春桑吉斯塔爾等或再留楊遇春在彼剿辦額勒登保仍應回至南岸督辦俾各股竄匪知經畧在彼駐劄心懷畏懼不敢覬覦東趨此爲

最要勿以奔馳道路爲盡心轉令賊人知所趨避  
東牽西掣又稽時日况追賊未見得力而我兵先  
形疲乏於事何益耶至長麟等摺內稱再添元樊  
人傑等匪係從總兵關騰所管汎地逸出過江請  
將關騰革職現在無人更替仍請留關騰在江岸  
防堵等語所奏非是關騰聞知賊匪在大紅石地  
方乘夜跣渡僅施放鎗礮轟擊可見關騰並未親



身前往督率堵禦獲咎甚重此等玩悞之員豈可  
仍令帶兵自贖關騰著革職拏問交與額勒登保  
審明按律定擬具奏都司徐萬寧雖未能嚴守卡  
座但賊匪衝突時該員尙知奮力抵禦因寡不敵  
衆受傷陣亡徐萬寧仍著若部照守備例賜卹至  
慶成本係棄瑕錄用之人額勒登保派令專在陝  
境防堵前此冉學勝由瓦春溝偷渡北岸已難辭

咎此次冉添元樊人傑復有竄過北岸之事本當  
治以應得之罪惟念慶成業已帶兵趕上賊匪殲  
斃多名且有截回之賊姑免深究若此後再有疎  
虞不能復爲寬貸矣再伍懷志一股賊匪祇剩二  
百餘名合之冉逆爲數不過六七百人而綸布春  
桑吉斯塔爾穆克登布汪啟等帶領兵勇一萬有  
餘不啻十倍於賊何以未能迅速剿滅如果有故



意逗遛情事著額勒登保據實叅奏再川陝楚各  
股教匪自剿辦以來節次將起事各首逆殲擒殆  
盡現在祇有徐添德王廷詔張添倫龍紹周數名  
其後起之賊惟高一馬五最爲兇悍此數股賊首  
必須設法剿捕按名擒獲斷不可任其潛匿稽誅  
然額勒登保等又不可因有此旨僅注意首逆一  
經殲獲卽置餘匪於不問如近日之伍金柱楊開

甲雖經殲斃而伍懷志楊開第等仍復四處奔竄  
其與伍金柱楊開甲未經殄斃何異嗣後帶兵大  
員獲一首逆卽當將此股餘匪殲除淨盡方爲肅  
清一股不可復留餘孽至剿辦教匪已及五年尚  
未竣事試思從前

皇考辦理準夷回部大小余川拓土開疆至遲亦不過  
五年大功全竣今剿辦內地亂民五年尙稽蕨績



朕之運籌指示遠不如

皇考實愧且懼本年夏秋之間各路軍營屢得勝仗賊

勢日就窮蹙滿擬於歲內一律蕝功乃近閱伊等

奏報情形賊股尙多歲內又成虛願現距釋服之

期不過四月若再有稽遲不能於釋服以前班師

奏凱朕何以仰慰

皇考在天之靈而額勒登保等更有何顏對朕乎况朕

節次指示辦賊方畧不外剿堵二者其於何路進  
兵截剿何處扼要防堵從未預爲遙制聽伊等相  
度機宜隨時酌辦而所需兵餉又不待伊等奏請  
俱係先期撥給卽額勒登保等節次保奏軍營出  
力人員無不悉照所請加恩其有玩悞軍務者額  
勒登保卽可一面拏問一面奏聞朕亦不以爲專  
擅是事權不可謂不重此外更有何掣肘難辦之



處乎若額勒登保等或另有籌畫不<sub>可</sub>據實陳明

候朕指示總須於明歲釋服以前將各股賊匪悉

數辦竣方不負朕諄諄訓諭所<sub>又</sub>懸盼至意又軍

營打仗兵丁最爲辛苦上年松筠在陝甘時曾自

請捐廉製備衣履近來並未有各督撫奏請捐賞

當此冰雪沍寒之候兵丁從征日久衣履恐有不

全殊深厪念本日已續撥該省銀五十萬兩著長

麟於此項內提出銀一萬兩解交經畧軍營傳旨  
賞給兵丁爲寒冬添補衣履之用俾三軍挾纊咸  
知感奮可期踴躍從戎一鼓集事額勒登保務當

遴派隨營文員實心經理並將動支數目造冊報

部查核令兵丁等均沾實惠又據陸有仁奏稱寧

羌州一股賊匪經鄉勇義首張廷魁守備李懷玉

奮勇堵禦該匪仍行折回又再添元樊人傑等匪



由茶鎮搶渡時經慶成等趕到奮力截擊殲獲多人已派總兵胡定泰追剿等語以上情節與長麟慶成所報大畧相同惟有冉學勝一股由城固竄至留壩據長麟等十九日拜發之摺稱該匪擾及廢邱關經綸布春汪啟等帶兵趕上奮勇截剿賊匪仍分股折回而陸有仁十七日拜發之摺則稱賊匪竄至留壩江口擾及棧道高橋鋪松林驛等

處看來竟有入甘之勢此股竄匪是否如長麟等所奏業已截回殊爲屢念甘省地方久已肅清若令賊匪竄過棧道勢必又致蔓延入甘更屬不成事體長麟本派綸布春汪啟在彼堵剿務當督飭該員等上緊攔截將此股竄匪掃除淨盡爲要又據稱德楞泰賽冲阿由太平馳入陝境分股截剿此語亦未經長麟等奏及此時額勒登保現在江



北剿賊而長麟又駐紮漢中德楊泰旣已入陝恐  
西鄉等處賊匪見大兵追逼緊急皆思竄入江北  
德楞泰等務須乘各股賊匪窮竄之時與陝省官  
兵兩路夾擊卽在西鄉一帶併力殲除必不得已  
亦應仍逼令入川勦辦易於得手其漢江北岸防  
堵尤關緊要前此賊匪已經兩次偷渡皆防堵各  
員疎懈所致今關騰業經治罪著額勒登保另派

委幹大員前往更替長麟慶成係總辦之員尤當  
督飭文武官員一體扼要堵截勿使南岸賊匪一  
名竄入爲要至摺內稱南山以內現有賊匪三股  
但西鄉石泉一帶尙有後來之賊情形較重又德  
楞泰等大兵入陝爲數益增糧餉更闕緊要朕因  
該省餉項須寬爲籌備不待伊等奏請已於本日  
續撥銀五十萬兩解陝應用該省軍餉自可源源



接濟不致缺乏但不可因帑項充餘任聽屬員稍有冒濫至長麟陸有仁會籌解散賊黨安撫難民一摺該督撫等將叛產等項逐一查清撥給難民以資養贍自應如此辦理若果能給予恒產固其恒心俾難民生計有資何至甘心去而從賊總在督撫等實力奉行嚴禁胥役藉端滋擾不可徒托空言也

上又命軍機大臣傳諭德楞泰勒保曰據長麟等奏  
川省各股賊匪竄近陝境經長麟慶成督率兵勇  
或扼要堵截或迎頭擊勦將匪衆逼回川境邊界  
而再添元樊人傑大股夥匪約有二三千人經慶  
成等趕上殲擒及淹斃外搶渡過江者有千餘人  
是此時川境腹地尙有何賊德楞泰勒保自本月  
十七日奏報截勦漁渡壩沙沱子兩股賊匪後至



今總未見續有奏報未知德楞泰勒保現在何處

勦賊此時正關緊要豈可任意怠玩所有川省邊  
界折回竄匪務當設法兜截勿令蔓延滋擾又據  
長麟等奏川匪一股由李家壩一帶北奔有竄入  
陝境之勢提督七十五由廣元追勦前來正可與  
長麟派往迎堵之和興額等兩面夾攻乃未見七  
十五進躡入陝豈七十五將賊驅逼出境遂爲了

事耶至軍營打仗兵丁最爲辛苦上年松筠在陝  
甘時曾自請捐廉製備衣履近來並未見各督撫  
奏請捐賞當此冰雪沍寒之候兵丁等從征日久  
衣履恐有不全殊深廑念前經撥給該省銀六十  
萬兩著於此項內提出銀一萬兩傳旨賞給兵丁  
爲寒冬添補衣履之用俾三軍咸知感奮以期一  
鼓集事德楞泰勒保務當遴派隨營文員實心經



理並將動支數目造冊報部查核令兵丁等均霑  
實惠正在降旨飭諭間接據陸有仁奏報德楞泰  
與賽冲阿由太平馳入陝境分投截剿等語此信  
未據德楞泰奏報該叅贊等既已追賊入陝看來  
川省已無大股賊匪現在額勒登保帶兵至漢江  
北岸剿賊德楞泰追躡前來正可與經畧等併力  
截擊將各股賊匪卽在陝境殲除淨盡必當優加

懋賞否則仍將竄匪逼回川境該省築堡團勇素  
爲認真賊匪無食可掠剿辦更易得手德楞泰等  
務當上緊籌辦奮勉圖功不可稍有延緩

同日

上命軍機大臣傳諭姜晟倭什布曰昨據長齡奏報  
由竹山房縣踰經抄截高二一股殲斃賊匪一百  
餘名而倭什布等前已跟蹤追截此時自與長齡



會合夾擊無難將高逆剋就殲除但高二馬五等  
俱在漢江南岸奔竄經畧額勒登保已督兵至漢  
江北岸剿賊該匪等本屬同夥與高二彼此聲息  
相通恐乘間竄入楚境是該省防堵尤爲緊要著  
姜晟倭什布等分飭將弁於扼要處所實力堵禦  
切勿稍有疎虞至軍營打仗兵丁最爲辛苦當此  
冰雪沍寒之候衣履恐有不全殊深廑念現已撥

給該省銀二十萬兩著卽於此項內提出銀一萬兩傳旨賞給兵丁爲寒冬添補衣履之用俾三軍咸知感奮以期一鼓集事所有此項銀兩該督等

務遴派隨營文員實心經理並將動支數日報部

查核令兵丁等均沾實惠本日據書麟奏業經兼程趕赴新任姜晟俟書麟到楚時將防堵一切事

宜交代清楚卽可來京陛見若書麟未到之先姜



晟仍須認真飭屬防堵不可稍有疎懈

同日長麟又奏言竊臣接准叅贊大臣德楞泰

署四川總督勒保來咨內開川省軍營索倫吉

林官兵所乘馬匹多因日久疲乏而川省各營

馬因節次調派已多均未能買補足額勢難多

調囑將甘肅調備之軍需馬內挑撥五六百匹

解送川省以資馳騁等因伏查官兵追剿竄匪

全賴馬隊馳驅衝擊方能克敵制勝川省軍營  
馬匹既屬短少自應不分畛域亟籌協濟

臣與

額勒登保札商意見相同惟查甘省前此調備  
各營戰馬三千匹除陝省調備新至吉林索倫  
官兵戰馬一千二百匹外尙存一千八百匹其  
時正當盛暑官兵逐日追賊各營馬匹久禾更  
換多有疲乏倒斃均經陸續調撥各路軍營更



換添補業已無存。臣當卽飛札總理甘肅軍需

局務蘭州道蔡廷衡在於甘省各標營馬內續

調健馬六百匹以五百匹作爲正馬以一百匹

作爲餘馬以備中途疲乏更換之用委員押解

前赴廣元除交足正馬五百匹外其挑剩餘馬

一百匹仍令委員解回漢中喂養以備陝西各

路調用並一面移咨勒保派員趕赴廣元接收

轉解以免遲滯奏入報

聞

同日倭什布長齡奏言竊臣等查探高二股匪

一起由龍口河直奔興山犬路一起由公坪向

東奔走均係興山地面臣等正在會商剿辦接

據陝省藩司溫承惠來信知徐添德一股賊匪

已由尚家壩南坪竄赴八角廟其勢東趨漸近



楚境囑令督飭邊防加意堵截等語查高二一  
股雖素稱兇悍究屬人數無多徐添德一股復  
向東來保無邀集餘匪探知官兵俱向南追計  
圖乘隙滋擾現在二竹雖有邊卡分兵堵禦並  
無大員督率辦理一經闖入所關匪細是以  
倭什布卽由後界坪率同副將吉林泰酌帶官  
兵六百名前赴二竹就近抽調兵勇偵探賊蹤

相機堵剿臣長齡會同明亮孫清元緊躡高二

一股如能一鼓殲除擒獲首逆卽當欽遵節次

諭旨辦理萬一逼入川境亦必隨賊所向跟蹤進剿

不敢稍有疎懈奏入

上命軍機大臣傳諭倭什布長齡曰前因額勒登保  
已帶兵至漢江北岸剿賊徐添德及高馬等逆俱  
在漢江南岸奔竄川省築堡團練防禦嚴密賊匪



不敢竄往必仍思合夥竄楚節降諭旨令姜晟等督飭員弁於湖北邊界實力堵截今據倭什布等

奏徐添德一股由尙家壩南坪竄赴八角廟其勢

東趨漸近楚境等語果不出朕之所料此股賊匪

本在安康一帶奔竄今又復東趨自由慶溥溫承

惠等祇能帶兵守衛本境未能跟蹤追剿所致但

楚省堵禦事宜爲姜晟等專責早經降旨令其加

意防範自應預爲籌畫派撥員弁扼要堵截乃此  
時尙稱二竹雖有邊卡分兵堵禦並無大員督率  
辦理一經闖入所關非細等語豈節次所降諭旨  
伊等竟未寓目抑竟不遵照籌辦爲此臨渴掘井  
之計所辦何事現在徐添德一股已向東趨其高  
三馬五等逆亦必接續竄楚若再任其先後闖入  
擾及均房一帶又成散漫何日始能蕝功此時倭



什布業由後界坪帶兵前赴二竹探蹤堵剿務將  
此股賊匪迅速殲除卽屬倭什布之功若能截賊  
不入楚境尙可將功贖罪倘仍前玩悞致徐添德  
等深入楚境朕惟有執法從事斷不能曲爲寬貸  
矣至高二一股經長齡等帶兵擊剿如能迅速剿  
淨固屬甚善倘逼入川境自應酌分兵力跟蹤追  
躡但長齡等仍當以防堵二竹爲重務須會同倭

什布併力堵剿勿令徐添德等股乘間竄入再有

延蔓

同日姜晟奏言竊

臣

自今春抵楚督辦軍需以

來軍營餉項約計官弁兵勇馬匹夫騾日應支

給數目飭局陸續撥解均勻支放近接撫臣倭

什布及隨營道員伊精阿來信知騾價等項多

有掛欠當卽添解接濟不致短缺此時各營俱



在二竹邊界凡省城運襄銀兩隨到隨卽儘數

運交卽局咨明倭什布就近調撥昨<sub>臣</sub>將收過

餉銀共計一百一十七萬現僅存銀七萬兩附

摺陳明而未經奏請

賞撥者因本年楚省經徵地丁錢糧共有若干現飭

藩司通盤籌計一面酌撥墊應且豫省密邇襄

鄭卽有不敷亦尙可就近酌借以濟急需<sub>臣</sub>接

准經畧額勒登保暨德楞泰咨到摺稿均稱川  
陝竄匪歲內大局可定則楚北留防費用以兵  
勇之多寡爲準應聽倭什布等臨時酌量情形  
核實奏明遵辦至邊防事宜臣綜核大勢郎西

竹山二縣知縣孔繼榘范繼昌團勇堵禦辦有  
成規已屬可靠卽房縣陰條嶺等處邊隘亦有  
險可恃現分布兵勇嚴防自無難於堵截惟首



谿邊界

臣

雖未親歷其境據先經派往之候補

道海昌暨鄖陽府王正常俱稱邊境綿長來路  
分歧現在倭什布長齡明亮孫清元等各領官  
兵於賊匪往來熟徑會籌併力迎探堵剿且竹  
谿團勇向稱得力值此川陝餘氛蕩平在即其  
襄鄖宜昌及荊門州所屬勸諭民間修建堡寨  
已有十之五六其尙未興修處所昨復專委原

陞辰沅道田瀨會同各府親加督催一律趕辦  
堡成卽令團勇以資捍衛仍飭令田瀨於辦理  
事竣通報查核奏入

上命軍機大臣傳諭姜晟曰前因楚省邊界綿長與  
川陝接壤之處防堵事宜甚關緊要是以諭知姜  
晟以書麟未到之前仍係該督之責不可稍存諉  
卸致有疎虞乃伊等從前所辦團勇設卡各事徒



託空言有名無實日前高二一股賊匪已由竹山

竄入房縣向南逃遁現據倭什布等奏徐添德一

股賊匪由尙家壩南坪竄入八角廟其勢東趨漸

近楚境而高二一股現亦在興山一帶分起奔竄

等語從前原因因此數股賊匪逼近楚省是以節次

降旨諭令嚴防至爲明切乃本日倭什布等摺內

又有一二竹邊卡並無大員督率之語是朕節降之

旨姜晟等總未遵照妥辦於無事時任意疎懈及至賊至始露張惶爲此臨渴掘井之舉該督究竟

所辦何事現在高二尙在興山奔竄而徐添德一

股又漸近楚境其高三馬五二逆亦必思接續闌

入若川陝邊界各股賊匪因楚境兵防疎懈紛紛

竄入擾及均房一帶其勢又致散漫何日始克蕩

功現在書麟到楚尙須月餘姜晟責任綦重尤應



督率所屬加意嚴防如書麟到後楚境已就肅清  
邊防寧謐始准姜晟來京陛見倘賊匪尙在楚境  
竄集剿捕未能蕪事卽書麟到後不但不准姜晟  
進京必將該督革職留於楚省隨同辦理防堵事  
宜効力自贖其直隸總督員缺不患無人朕必另  
行簡員補放姜晟此時勿謂交卸有人遽存諉卸  
之想也

三

言國有德效美是此物以時交國時入豈可無國

宜故以自獻其血燕燕皆良地不致無人想必民

數京必欲濟育草鄉皆外教官國同獲聖訓淑惠

寬樂陳許宋伯燕建山書編既然不世不恭美氣

製列聖猶欲究美是美京朝只命無阻向五教賦

贊寧也國賦意猶也明書編既然不世不恭美氣



欽定剿平三省邪匪方略正編卷二百十九

庚申年

十一月二十七日乙巳山東巡撫惠齡奏言據膠

州協副將寧德稟稱本年十月內接准湖北襄

陽縣遣回該營傷病兵丁張福元等七名又高

維元等九名先後到營執有襄陽縣文移二角

當卽驗看該兵等傷病情形有現尙未愈者有

漸次就痊者及展閱來文見其格式乖異印文

模糊似有情弊將原文稟送前來臣查核來文

詞句乖錯清漢篆文俱屬錯悞其為假造無疑

當卽一面飛飭湖廣總督查辦一面飭提該兵

丁到省交按察使方維甸嚴加訊鞫茲據錄供

詳報臣逐一研訊該兵丁等僉供委因傷病留

養襄陽業經驗明有店家魏明揚及長隨佟福

轉托襄陽縣家人汪姓及兵房書吏王姓任姓



許給謝銀始得給文回營張福元等七名給銀  
四十兩高維元等九名給銀二十五兩零是否  
假印實不知情等語但查該傷病兵丁在襄陽  
縣留養業經稟驗因何復免人賄囑領取文書  
種種疑竇必須解楚質訊方成信讞臣正在委  
員起解適接湖廣總督姜晟咨稱查出襄陽縣  
雕刻假印捏造文票給與傷病兵丁執持回營

情弊並稱高維元等一起兵丁內徐成業有知情分贓之事咨查前來隨復提徐成業嚴訊堅

不承認供係與佟福爭毆挾嫌誣扳顯係因質

証無人藉詞狡飾現已將張福元高維元徐成業三名選派妥弁解交該督究訊定擬其餘兵

丁于廷龍等訊供相同毋庸遠道解往已令該營嚴行管押俟楚省訊明知會到日再行辦理



再查軍營患病受傷兵丁在各州縣留養如一  
時不能痊愈原應驗明遣回以節糜費但各兵  
回營多由各州縣給文遣發是留養各兵隨處  
皆可領文回營毫無稽考偽造印文詐騙之事  
皆由此起卽實係各州縣給文遣回之兵人數  
較衆亦難保無串通吏胥捏報傷病情弊嗣後  
傷病兵丁留存各州縣調養者應令該地方官

集字三卷之三  
三  
報明經畧叅贊及該領隊大員派委軍營將領  
前往驗明實係養病受傷驟難痊愈者由驗明

將領發給文票方准遣回如距軍營較遠卽報

明該省督撫解送就近道府驗明屬實卽由該  
道府給文遣回所有驗明遣發兵丁名數均造

冊申報經畧叅贊各該督撫及領隊大員查核  
以杜規避而除積弊奏入



上諭內閣曰此案著交姜晟嚴審定擬具奏至軍營  
傷病兵丁在各州縣留養原應驗明遣回若不明  
定章程以憑稽核則各處留養傷病兵丁一屆大  
功告成均須回籍倘誤作逃兵沿途截拏成何事  
體但徑由州縣給與文移又不足以昭慎重其中  
捏飾賄囑串通弊混之事自所不免嗣後傷病兵  
丁經該營大員驗明交與地方官留養者如遣令

回籍俱應報明督撫由該處道府大員發給文移  
不得仍前由州縣率行遣回著經畧叅贊等通諭  
各路軍營將各處留養患病受傷兵丁詳加查核  
早令回籍歸伍以示體恤而杜弊端

二十八日丙午額勒登保奏言竊臣前以漢江北

岸先後有竄去之賊關係緊要於十五日由安  
康過江連日由漢陰石泉緊顧東面趨程行走



茲於二十日已抵兩河五郎廳地界途次接據  
綸布春汪啟稟報冉學勝股匪於月前竄過江  
北之後附近裏脅人數已有一千數百餘衆欲  
由石泉鎮安一帶徑竄東北適汪啟在銀杏壩  
探剿伍逆餘匪聞信卽由五郎關扼竄鎮安之  
路該匪知有官兵折從甘家礪三河口向西而  
遁汪啟帶兵卽由大白河東嶽廟石洋溝等處

追逐該匪從深山密箐狂奔又由茅坪八里關  
竄至迎風壩汪啟於初八日趕至茅坪維時綸  
布春亦帶兵到來遂合兵由華陽一帶進剿賊  
匪連夜逃逸我兵於十二日追至留壩之磨子  
溝探得賊匪竄至玉皇廟地方相距五十餘里  
遂於三更發兵天明時距玉皇廟不遠拏獲賊  
探三人訊知賊匪聞有兵來已於兩邊山溝埋



伏汪啟帶兵卽由玉皇廟右手上山並令副將  
玉福帶兵由玉皇廟左手上山綸布春帶領馬  
步兵勇由溝內直入密探山灣樹林果有賊匪  
潛藏我兵高聲喊令埋伏之賊莫逃該匪知己  
識其奸計且見溝內馬隊業已衝出兩面山上  
均有兵下壓不敢抗拒紛紛敗竄步行賊匪四  
散奔入箐林騎馬賊匪順溝飛奔綸布春汪啟

等分路追擊自凌口子至土地嶺約計四十餘里沿途殺賊共三百餘名生擒一百餘名奪獲器械百餘件騾馬三十餘匹新被裹脅百姓散出者不少餘匪向桃園舖奔逃次日仍帶兵進剿等情旋又接據穆克登布報稱伍逆餘匪經官兵節次搜捕之後所剩只有二三百人近於都督河厚畛子菜子坪一帶逃竄一見官兵四



散潛匿山林叢峻之處尋覓無蹤實爲可恨十  
二日探得該匪竄至女兒壩龍灘子一帶遂將  
所帶官兵分爲兩路令副將張鳳帶領一千餘  
名跟蹤追剿穆克登布與桑吉斯塔爾等帶兵  
勇一千餘名由周家坎東嶽廟顧住東北向前  
抄截十三日晚間趕抵四畝地探得另有大隊  
賊匪不知何股至太白廟相距只有三四十里

穆克登布黎明正在進擊又據報賊匪已分兩路前來穆克登布桑吉斯塔爾率同碩敦保雅林保副將富蘭遊擊桑漢等帶領兵勇數百名向賊多處迎擊並令副將愛星阿侍衛明喜委叅領德舒遊擊王成傑帶領兵勇數百名亦分一路迎擊賊匪恃其人衆亡命直撲官兵我軍各併力進攻兩路斬賊各數十人委叅領德舒



力敵陣亡遊擊王成傑亦受矛傷賊已敗走穆克登布乘勢帶兵追逐而進早間因急於發兵營盤鍋帳未動留遊擊周國平照料乃賊匪又分股潛往衝突營盤周國平竭力堵禦因各營內所留兵勇共三四百名本屬無多衆寡不敵且十三日晚間劄營已遲墻壕未能設立堅固營內夫役慌亂以致賊匪突入營盤放火燒燬

鍋帳並有甫經解到餉銀三千兩亦被搶失及至愛星阿帶兵回顧已屬無及委防禦全福筆帖式布詹皆在營奮力殺賊陣亡糧員候補知州畧陽縣知縣崔五峯頭帶矛傷一處不重其時

穆克登布桑吉斯塔爾追賊去有十餘里又已殺賊一百餘名忽見後面有賊撲來諒係營盤有失立即帶兵首尾兼顧左右奮力衝殺賊勢



稍却遊擊桑漢腿受子傷二處幸未墜馬外委  
蘇耀昌熊泰陣亡天色已晚與副將愛星阿收  
集各兵佔劄山梁是夜賊匪仍分股環撲營卡  
均經我兵擊退將獲賊訊供此股係二次過江  
再添士王思茂樊人傑之子等股賊衆前因湖  
北上龕被剿自徐家壩奔四川之太平竄入陝  
西過江由石泉饒峯銀杏壩五郎之青草關等

處竄來等情臣查目下賊股分投亂竄此次穆

克登布等分兵原擬截剿伍逆餘黨不意猝遇

冉王樊等賊衆紛至沓來臨時又不得不酌分

迎剿兵力過單以致留駐營盤失利實堪焦憤

幸穆克登布等輾轉力戰官兵未至大有損傷

必須大加整理臣已檄飭穆克登布並副將張

鳳帶兵卽來臣營聽候指撥此股冉王樊各逆



續竄過江曾經慶成派有總兵胡定泰追剿緣

於途次等候抽集官兵於十六日始得趕抵四

畝地是日賊已竄往洋縣之三郎壩東嶽殿呂

觀河等處該鎮卽跟蹤追剿惟查賊勢旣衆胡

定泰所帶之兵二千餘名恐有不敷臣刻又派

楊遇春格布舍帶領馬步兵勇三千餘名馳往

合力剿辦又查綸布春所剿之冉學勝賊匪探

報已出車道河酒店梁逼近鳳縣地界並恐後  
股之冉王樊各逆一經楊遇春等緊追亦尋前  
蹤而去或合竄甘境我軍自當跟往剿洗則應

用軍糧甘省亦須趕辦長麟前在漢南將川省  
竄出之賊業經截殺回川目下寧沔一帶無賊  
且尙有總兵楊奎猷在彼駐守慶成雖在西鄉

聲勢亦可聯絡已已札致長麟趕緊催辦糧餉



以利師行再查漢江以南之徐添德高馬等逆  
連日採報尙在紫陽安康交界處所慶溥帶兵  
於泰山廟獅子壩等處叠次截剿斬獲一百數  
十名惟外委牛奉林陣亡喜明馬玉魁温承惠  
率領兵勇亦在大貴坪白土關攔截臣亦經飭  
令慶成喜明馬玉魁温承惠等分投相機截剿  
總以緊顧東面先杜入楚之路爲要但江水淺

涸難保該匪等又不竄江北並探伍逆餘黨尙

有零星在於附近老林潛匿者臣率同札克塔

爾於兩河暫劄遏截東竄道路一面撥派兵勇

搜捕伍逆餘黨一面控扼漢江以南之賊師行

移步換形亦難預行懸定惟當權其緩急上緊

籌辦奏入

上命軍機大臣傳諭額勒登保曰昨據長麟奏冉學



勝一股賊匪由城固竄至留壩擾及廢邱經綸布  
春汪啟等趕上截回而陸有仁奏報則稱賊匪竄  
至留壩江口擾及棧道高橋鋪松林驛等處朕卽  
料及此股賊匪有入甘之勢今據額勒登保奏冉  
學勝一股已逼近鳳縣地界并恐後股之冉王樊  
各逆一經楊遇春等緊追亦尋前蹤而去或合竄  
甘境等語果不出朕所料近日有從陝西來京之

員朕詢知陝省收成歉薄是以賊匪無從掠食不  
能在陝境逗遛輒思他竄此正

上天垂佑爲剿賊極好機會但亦當盡人事以迓

天庥今閱額勒登保摺內所奏情形札知長麟趕緊催  
辦糧餉以利師行看來額勒登保又有追賊入甘

之意此則不可冉學勝一股爲數無多卽合之冉

王樊各逆亦不過一三千人况甘省地瘠民貧賊



勢斷難在彼久住其意不過詭誘大兵赴甘復又  
乘間折回東竄若額勒登保墮其術中帶兵前往  
必又成尾追之勢况經畧總不可頻頻移動又恐  
漢江以南高馬等逆必致接踵竄至江北且昨據  
倭什布奏徐添德一股竄入八角廟其勢東趨已  
近楚境以目前剿賊緊要機宜而論與其令各股  
賊匪東竄湖北邊界或闖入鎮安商維一帶毋寧

任其入甘剿辦轉易爲力額勒登保斷不可帶兵  
入甘惟當堅持定見督同札克塔爾等在陝境適  
中之地扼要駐扎持以鎮靜既可遏賊匪東竄之  
路又可控扼漢江以南之賊現據勒保奏德楞泰  
已帶兵至陝省西鄉地方剿賊大獲勝仗是漢江  
以南既有德楞泰在彼足資剿辦其冉學勝一股  
及冉王樊各逆如果合竄甘境長麟係本省總督



卽責成伊帶兵入甘追捕額勒登保已派楊遇春  
格布舍帶兵勇三千馳往正可幫同長麟上緊剿  
辦額勒登保總以顧往東面爲要若漢江以北賊  
匪剿剩無多或仍駐南岸更與德楞泰聲勢聯絡  
又據摺內稱穆克登布發兵分擊賊匪其營盤鍋  
帳留遊擊周國平照料乃賊匪突入營盤燒燬鍋  
帳並搶去餉銀三千兩周國平係穆克登布派令

專管營盤之人於賊匪衝突時防禦筆帖式俱在  
營殺賊陣亡而周國平竟不知下落著額勒登保  
查明如周國平業經同時陣亡著降一等照都司  
例咨部賜卹若未經一陣亡卽當將伊革職嚴審定  
擬治以應得之罪所有此次陣亡之委叅領德舒  
防禦全福筆帖式布詹外委蘇耀昌熊泰牛奉林  
俱著咨部賜恤至蘊楞泰在西鄉剿賊一節尙未



據奏到額勒登保是否聞知或德楞泰業經發摺  
經過梭道時竟有阻隔遺失之事並著額勒登保  
查明具奏

同日勒保奏言查德楞泰統師進山節據探報  
賊匪在川陝邊界老林輾轉奔逃德楞泰派令  
總兵托雲泰駐防城口卽自帶馬步官兵突入

陝境追躡嗣在西鄉地方有賊乘夜偷撲營盤

當卽督兵擊退獲有勝仗所有此路糧運均經  
各糧員設法運供幸無貽悞現聞德楞泰追賊  
至通江邊界不遠昨又措銀二萬兩赴通江一  
路迎交以濟兵餉又因老林內馬力易疲適經  
畧額勒登保撥有營馬到川亦卽籌撥三百匹  
就近解往接濟至七十五一路官兵駐劄廣元  
現據探報有賊一股竄至寧羌廣元交界之麻



池壩七十五已分兵兩路馳往截剿其餘川夷  
川北境內並無大股賊匪惟近據東鄉開縣稟  
報有零星散匪百餘人在該縣連界之大旺山  
深林內潛匿乘夜摸樁臣已派令總兵永寧率  
領遊擊桂涵酌帶兵勇前往搜捕無論有無著  
名首逆在內總須一律殲除各州縣寨砦鄉團  
並嘉陵江派防兵勇恐有日久怠生均已分派

委員逐處曉諭利害點驗人數務各齊心協力  
加意嚴防不可因現無賊氛稍有疎懈兵餉運  
脚等項近因新餉未到太平一路存糧甚少擬  
卽親赴東鄉一路逐站查催並設法添雇夫騾  
源源運送以期有備無患並可就近督辦搜捕  
餘匪仍偵探東北路何處有賊竄入卽往何處  
迎擊斷不敢株守一隅自取咎戾



勒保又奏言伏查此次教匪不法到處裹脅良民隨行助勢當官兵進剿之際難免玉石俱焚迨臨陣出投並於生擒男婦內訊明被擄未久或剿散後自向各州縣營卡報名投首者均經遵照節次欽奉

恩旨給與銀米遞籍安置在臣與德楞泰兩路軍營

每遇打仗得勝凡應釋者或數百人或數十人

均交隨營總理道員等於訊明後給予黃旗派  
令將備等押赴附近州縣交與該地方官查照  
姓名籍貫派差逐程遞送回籍並無途中流落  
之事到籍後均令查照臣前奏通飭章程隨時  
驗收酌給搭棚之資准其依附親友寨落編甲  
居住查明田產給還可毋庸官爲照顧其無依  
無業之民年強力壯有人具保者或點充團勇



或僱作夫役無人具保者或聽其各就手藝自  
爲謀生或地方有承辦土木工程令其受雇以  
工代賑其實在無依之老弱婦女卽在寬敞地  
方搭蓋草棚分別男女約五六人合住一棚每  
日每名給米五合柴薪錢五文俾免失所行之  
頗有成效本年臣到川後因通巴一帶向爲賊  
匪出沒之所專委劉清前往辦理招撫之事自

六月至今陸續投出難民實有一千七百四十  
七名均經給與路票銀米遞籍安插其餘向各  
州縣營卡自行投首者更不一而足每日地方

官管收遞解均有報冊可稽經臣派員專司核

對清查並無冒濫遺漏情弊惟難民有在荒僻  
處所自行逃出及離家較近亟欲奔回並未赴  
營卡及地方官投首不請執照而自行回籍者



先經臣通飭只可聽其自便不可過於吹求致

滋疑懼亦不許親朋及寨長人等索詐攻訐查

此等各自回籍之人大抵皆有家可歸本不必

官爲安撫惟令該管約保等隨時報明州縣立

案甚屬相安並不令胥役稽查斷不致有藉端

訛詐之事臣每遇帶兵經過城鄉寨洞查詢被

擄逃回之人其中割去髮辮者居其大半甚至

有被擄一二次不等者訴其在賊隊中逼脅受  
苦情形言之無不淚下察其情狀回籍後均得  
各安生業自不致復思從逆間有一二於到家  
之後仍復誦習靈文經咒者均經飭令地方官  
查訊明確將無知者量予責懲有心者嚴行治  
罪現各安靜守法毫無異心竊念此事本祇責  
成該管道府董率辦理惟通巴一帶係派劉清



在彼經理茲蒙

聖訓查各府州堅壁清野等事本派有道府丞牧等  
官如劉清方積淡士灝周景福等分段管理所  
有安撫一事應卽專責各該員督同地方官實  
力稽察妥爲安頓均令衣食有資以期仰副

皇仁不使一夫失所至每逢官兵打一勝仗卽有剿  
散餘匪或百餘人或數十人或一二十人在深

山樹林內潛藏出沒亟須分兵實力搜查現在  
川省團練鄉勇極爲認真此等零星教匪盤獲  
解送者甚多現又遵

旨嚴飭各地方官以徐添德王廷詔高二馬五樊人

傑龍紹周張添倫等著名首逆現經官兵逼剿

愈緊自不難悉數殲除設或被剿情急亦如張

子聰等隻身潛逃欲於幽僻處所延喘偷生務



各隨時策勵團勇嚴密搜查按名弋獲並明定  
賞格以冀觀感奮興自不致兇渠漏網再前奉  
諭旨飭令清查叛產維時因恐從逆民人聞知田產  
俱已入官無從歸業愈堅其從賊之心是以尙  
未徹底清查然川東北境內自教匪起事以來  
地方官先有隨時查辦召佃收租者亦有無人  
承種連歲荒蕪者近因逃出投首之人甚多有

隨時給還復業者刻下川境日漸肅清善後各  
事均須次第辦理臣現飭該道府會同委員督  
率地方各官實力清查將習教謀逆同時起事  
田產例應入官者爲叛產被脅被害民戶尙有  
避難家口遠去未經搬回者爲荒產全家被脅  
被害並無丁男婦女存留者爲絕產分作三項  
造冊立案此後無分教匪難民如果從賊隊中



真心出投仍當查明給還其餘荒廢田地普行  
召佃收租自明年爲始將每年所得租息據實  
報明彙解該管府州作爲歷次支撫難民項下  
彌補開銷統俟事竣查有實數另行報部以歸  
覈實再查川省自教匪滋事以來所有川東川  
北兩屬地方屢次被賊蹂躪失業民人前經英  
善宜綿任內奏請賑卹甫經查辦達州東鄉新

寧等處旋因賊蹤竄擾無定本未一律辦竣迨  
臣到川後查被賊州縣較多若隨時給賑需費  
恐難爲繼是以未經奏請查辦嗣奉

恩旨如賊黨中受撫來歸者均令籌給居食之資旋

經通省司道議稟以被脅從賊民人投出概須  
安撫而各州縣並未從賊之被難民人反不能  
早爲賑卹不特失業堪憐且恐難民等以從賊



之人尙邀

聖慈撫卹而伊等眷口被害房屋無存轉不得仰叨

仁澤未免向隅等情

臣

因各州縣被賊滋擾該百姓

等劄寨保守在家產素裕者固可自謀生計而  
困苦無依嗷嗷待哺者亦復不少然又不能逐  
戶照例普行散賑是以奏明於

賞撥餉銀內撥出五十萬兩以十萬兩爲賊隊中散

出難民居食之資儘此四十萬兩發給實無依  
靠之極貧難民兩月口糧統計二十七廳州縣  
輕重不一每處不過給銀一萬有餘及數千兩  
不等當經飭令司道等妥議章程隨據川北川  
東兩道籌議條款內稱向來川省報部民數戶  
口冊籍俱就土著而言此次清查民數尙有被  
難客商人等既經流年寓有自應一律查辦以



免偏枯等情蓋緣川省地方土田饒沃各省流  
寓民人或因商販占籍或因耕作寄居生齒日  
繁遷移無定向來報部戶口俱由土著民人約  
畧而計核之各州縣實有民數則大相懸殊茲  
既被賊蹂躪則流寓之民與土著之民自應一

律仰沐

皇仁不便稍爲歧視當經臣批司核議旋經藩司林

樵議以流寓之民部中並無戶口冊籍可稽應  
請先行咨部以歸覈實緣司詳內聲敘不明致  
干部詰而魁倫並未通查前後原案及歷年實  
在辦賑情形祇將臣上年二月間覆奏安撫投  
出難民之摺抄送到部實與賑撫無涉臣前奉

諭旨卽飭藩司楊揆詳細確查茲據該司查明上二  
年奏請辦賑之四十萬兩各州縣有將極貧難



民全數賑訖者有祇賑一隅者有因賊匪不時

出沒難以查辦並未散給者所有前項撥出散

賑之銀四十萬兩尙存剩十餘萬兩辦理實爲

樽節並無冒濫開銷卽該司道原詳內亦止據

實聲明川省情形並未於賑卹案內另立流寓

一款以爲影射分肥地步刻下各州縣民人均

經分劄碉寨各保身家且軍務未竣當夫充勇

尚可自謀生計現因餉項短絀不但前此存剩  
之賑撫銀兩已歸入軍需項下動用不能於賑  
撫案內浮冒開銷卽如本年嘉陵江以西各州  
縣被難民人先經臣奏請賑卹嗣又查明百姓  
漸次復業均各相安毋庸給予賑濟旋卽停止  
更不至有所朦混奏入

上命軍機大臣傳諭勒保曰德楞泰現已帶領馬步



官兵追賊入陝在西鄉地方將偷撲營盤賊匪奮力擊退大獲勝仗尙未據德楞泰奏到或因棧道稍有阻滯抑或馳報在途日內自可遞到至川東川北看來已無大股賊匪其東鄉開縣連界處所有摸樁賊匪百餘人在深林潛匿勒保切不可因其人數零星稍存輕視此等賊匪其始不過百餘人若不及早撲滅則勾結裹脅必致日聚日多集

成入股辦理轉爲費手今春偷渡嘉陵江卽係摸  
樁之賊魁倫未能加意嚴防身獲重罪勒保當引  
以爲前車之鑒現已派令總兵永寧等帶兵搜捕  
勒保務須嚴飭該鎮將等上緊剿辦殲除淨盡毋  
留餘孽此爲目前最要之事至所稱偵探東北兩  
路何處有賊卽從何處迎截等語此係勒保分內  
應辦事件又所奏酌給銀米安撫難民一摺據稱



難民內老弱婦女無有依靠者搭棚棲止每日每名給米五合柴薪錢五文等語此亦非長久之計該督仍須妥爲籌畫設法安頓務令得所至投首回籍之人間有一二於到家後仍復誦習經咒者原可不必深究前曾屢降諭旨官兵剿辦係叛逆亂民並非殲除邪教若如勒保所奏飭令地方查訊確實將無知者量予責懲有心者嚴行治罪如

此分別辦理則胥吏等又得以查辦爲名擾累滋  
事前此川楚匪徒皆由地方官查拏邪教激成事

端勒保寧不知之此奏斷不可行其清查叛產分

別三項造冊立案自應如此辦理再據覆奏賑卹

難民銀兩一節係因魁倫未經通查前後原案及

歷年辦賑實情以致部臣駁劾著勒保另行分晰

查明咨部察核



欽定剿平三省邪匪方略正編卷二百二十

庚申年

十二月初一日

己酉

德楞泰奏言竊

臣

前在太平

白菓壩與勒保會商籌剿勒保暫回太平

臣

卽

帶兵直趨城口進發十一月初八日行至平壩

三灣接據署城口主簿張雲漢稟報該處賊匪

聞大兵前來又被團勇截殺已經遠遁現在城

口地方已無賊股滋擾因思城口地居萬山之

中爲太平紫陽平利大寧四邑往來適中要隘  
歷年以來各逆藉爲藏身之藪現當賊勢萬分  
窮蹙之際若無兵駐防則各匪往來屯踞其間  
而兵至賊去兵去賊來殊多窒礙當令總兵訖  
雲泰等帶兵勇三千名在彼擇要拿營以杜賊  
匪竄陝之路並可搜剿山內餘匪正在哨探賊  
蹤間接長麟移稱據南鄭城固西鄉等縣稟報



前在花石梁螞蝗溝鍾家溝旗杆山細辛壩等處竄擾各匪均已先後逼出陝境但仍在界嶺一帶老林內遊奕尙未遠去又接提臣七十五

來信以現在川北賊匪時欲窺伺廣元蒼溪一

帶江岸賊衆兵單恐難兼顧各等情查太平山

內各逆業已遠颺

臣

自不便遠涉城口致疲兵

力且川北已有數股賊匪尤應先其所急况邊

界老林之賊未便令其盤踞自應逼令入川亟  
爲剿辦但我兵若由太平大道直赴川北又恐  
邊界之賊聞風入陝臣遂由西鄉之漁渡壩簡

池壩等處邊境行走繞出賊之北面逼賊南向  
十八日趕抵南江之舊城探得楊開甲等三姓  
餘黨並李炳陳朝觀兩股合夥每股數百人于  
餘人不等約共三四人聞我兵由東北而來



不敢零星散處合爲一股由賈元蒼溪境內走  
南江之元潭子巴州之南埡場華溪寺一路向  
東奔逃七十五因廣元旺蒼瀾等處尙須搜捕  
零匪且可就近防顧江岸未便遽行移動

臣又

撥給兵一千名卽令其仍在蒼廣南巴一帶擇

要駐守搜捕餘匪可以照應江岸並遏該匪由

川北竄陝之路

臣

卽帶兵星夜前進查楊陳李

等各逆業已東走非竄東達雲開即去通江太

平勒保因聞賊有東趨之信已由太平趕至東

鄉臣即札致勒保由東鄉探迎截擊臣帶兵即

自西北而東正可收兩面夾攻之效務期將此

股賊匪即於川境內趕緊掃除斷不令其復又

他竄頃又接據張雲漢稟報太平接壤陝境之

修溪壩高觀寺等處又有賊匪滋擾不知首逆



姓名現已稟明託雲泰各等語查太平山內團  
勇素爲得力現又添駐官兵聲威更盛當已飛  
札託雲泰等會同張雲漢多集該處團勇分投  
堵剿務須就地掃除否則亦當逼入川境總不  
可令其再行折陝現在各逆無非敗殘餘匪自  
知罪惡貫盈滅亡在即見兵卽逃惟以狂奔爲  
苟延殘喘之計

臣

旬餘以來自東北而西南西

鄉邊界一帶並無賊匪未得接仗憤懣焦急茲  
已幸得將各匪逼令夥聚東竄惟有趕緊剿除  
萬不敢稍予以暇自取遲延之咎奏入

上命軍機大臣傳諭德楞泰勒保曰德楞泰半月以  
來未有奏報日深厯念嗣據勒保奏德楞泰統師  
進山節據探報賊匪在川陝邊界老林輾轉奔逃  
德楞泰派令總兵託雲泰駐防城口卽自帶馬步



官兵深入陝境追躡在西鄉地方有賊乘夜偷撲

營盤當卽督兵擊退大獲勝仗其餘川東川北境

內並無大股賊匪惟東鄉開縣有零星散匪百餘

人在大旺山深林內潛匿乘夜摸樁已派兵前往

搜捕等語方以德楞泰捷報當已在途或因棧道

阻滯尤深盼切乃本日德楞泰奏報不但未獲勝

仗且往來奔逐竟未與賊接仗其所稱由西鄉邊

境行走繞截賊匪逼令夥聚東竄之處不過敷衍  
空言且摺內只稱楊開甲等餘匪及李炳陳朝觀  
兩股賊匪現在東竄而於黃白藍線各股竄匪絕  
不提及非巧言搪塞乎昨據額勒登保奏再添士  
王思茂及樊人傑之子等股賊衆由川省太平竄  
入陝境渡過漢江北岸欲圖合竄甘境非卽黃白  
藍線股內之賊乎看來德楞泰於此等大股賊匪



並不能實力攔截縱令竄出川境不過以截回小  
股賊匪支吾搪塞實亦並未跟蹤追躡又憚於赴  
陝惟藉稱川境賊匪未經剿淨留爲跼脚地步或  
伊在西鄉於賊匪偷劫營盤時竟至折挫失利未  
敢據實奏出亦未可定而勒保輒以德楞泰奮力  
擊退大獲勝仗具奏若非勒保探報不實卽係德  
楞泰有意隱瞞思掩飾其挫衄之咎以致伊二人

前後所奏互相矛盾二者必居一於此卽所稱兵  
至賊去兵去賊來二語難辦之處固在於此但德  
楞泰等必當同心併力設法奮擊方可以次殲除  
若徒以剿辦窒礙爲詞任賊肆行竄擾毫無振作  
惟事往來追逐轉至兵力疲乏則兵至賊去兵去  
賊來長此安窮豈竟待賊自盡又安用集兵糜餉  
爲耶况該省兵力不爲不多所需餉項並不待伊



等奏請節經陸續撥解似此兵精餉足尙何可藉

口而蕝事迄無把握所辦何事德楞泰自稱憤懣

焦急試思剿辦賊匪如此延玩空言何益而朕之

焦急實有刻難自釋者德楞泰寧不知之且軍務

一日不竣生靈受其荼毒尤不忍言德楞泰何得

泄泄若此實屬負恩著傳旨嚴行申飭勒保前奏

不實亦著傳旨申飭並著伊二人將因何前後奏

報彼此不符之處各行明白迴奏伊二人業已貽  
悞於前此時惟當各知愧懼奮勉自効務於年內

將川境賊匪悉數辦竣德楞泰仍當赴陝協剿漢  
江南岸之賊且現在陝境如冉添士王思茂樊人

傑之子各股賊匪卽係川省不能實力攔截所致  
本卽應治罪今暫從寬若能將本境之賊先行剿  
淨移兵前赴陝省協剿竄匪尙可稍贖前愆尙仍



前怠玩 則是甘蹈重罪身家性命所係禍福惟其  
自誤此時卽革去花翎降其頂戴亦不足示懲姑  
俟伊等奮力自贖若屆期不能辦竣朕惟有執法  
從事按律懲辦斷不寬貸亦不患無人更換也稟  
之慎

初二日

庚戌

上命軍機大臣傳諭各路軍營帶兵大員四川陝甘

湖北各督撫曰自邪匪滋事以來剿辦已及五載  
總無蕺事之日近據各路奏報賊匪仍復東奔西  
竄官兵雖隨處追擊總不能遏其去路歸併一處  
聚而殲洗看來年內蕺功之說又成虛願推原其  
故總因帶兵大員及各督撫等仍存此疆彼界之  
見祇將賊匪驅逼出境卽爲盡職並不協力會剿  
以致川陝楚三省竄匪出彼入此來往自如卽被



一路防堵官兵剿敗殺賊雖多而前無擱載後無  
追躡沿途裹脅又成大股仍與未經剿殺者無異  
似此輾轉奔逐年復一年何時始能剿盡亦斷無  
如此追逐卽能成功之理是堵之一字亟須實力  
辦理從前降旨令伊等各在本境堵剿原因彼時  
股數甚多不得不各顧疆界以專責成嗣經官兵  
節次剿殺各股賊匪統計不過萬餘而奔竄地方

亦僅在川陝楚三省邊界伊等正當無分畛域或  
併力合剿或互相策應以期一股殲除乃彼此推  
諉觀望人各一心並不曾籌協剿使賊匪得以紛  
紛四竄其勢又將散漫譬諸行圍必須面面兜合  
漸逼漸緊方能有獲若四散驅逐卽終日而不得  
一禽此事之顯而易見者伊等寧不計及耶辦賊  
之法不外剿堵撫三者而均以兵餉爲要現在各



路征兵不下十萬軍威不爲不盛而所需餉銀朕

不待伊等奏請無不預爲籌撥源源接濟卽如陝

省南山內伍逆餘匪所剩不過二百餘人而官兵

現在萬餘不啻多至數十倍尙未見搜剿淨盡若

似此辦賊卽百萬雄兵亦復可益伊等尙得藉口

於兵力不足乎至各路軍營若果因餉項不繼致

有掣肘則朕先認過軍機大臣不能先事預籌尤

難辭咎朕豈肯令伊等稍有缺乏致悞事機斷不  
必以此爲慮且朕之宵旰焦厘者蓋賊匪一日不  
除則百姓多遭一日慘殺生靈荼毒村落爲墟言

念及此朕實寢食俱廢伊等尙不思激厲愧勉同  
心敵愾耶此時東面有倭什布長齡西面有長麟  
慶成南面有德楞泰勒保北面有額勒登保楊遇  
春等總須四面嚴堵彼此通盤籌畫聯絡聲勢協



力以堵爲剿卽在川陝楚邊界將各股竄匪悉數  
殲擒方爲不負委任大功告成八人同受厚恩是  
朕昕夕代汝等默禱於

天之至願卽萬不得已亦祇許將陝楚之賊逼歸四川  
剿辦易於得手斷不許令四川之賊竄往陝楚卽  
如德楞泰昨奏因楊陳李等逆有東趨之勢德楞  
泰卽自西北而東繞出賊前迎截伊旣知賊匪不

可令其東竄陝境卽應遏其去路奮力剿盡何以  
任其東趨始行繞道抄截而藍黃白線號內之丹

添士王思茂及樊人傑之子本由川省竄往湖北

嗣復由湖北竄回川省今又從川省逸入陝境復

圖合竄入甘此卽德楞泰勒保不能截住川省大

股賊匪之明証在四號逆賊由楚假途入陝蜀地

弁兵所辦何事今僅將楊李陳等小股截回於事



何益耶總之賊匪聚則易剿散則難辦兵力合則厚集分則見單伊等接奉此旨後若再不同心合力速將各路賊匪悉數掃除延至明春青苗在地賊匪仍得掠食飽颺又稽歲事軍法具在朕亦惟有將伊等按律治罪此亦伊等自貽伊戚實不願國家有此事惟在伊等勉圖贖罪迅奏膚功勿負朕諄諄教誡也

臣

等謹案兵貴神速蓋轉移進退之機有間  
不容髮者此次剿捕之事自經

睿謨訓示嚴切督促以來各路元戎疊奏俘渠告捷  
之功特以賊股散漫狡黠走險沿途復有裹  
脅官兵馳逐往來尙稽葺績

皇上宵旰焦厘以賊匪一日不除則百姓多遭一日

慘殺



軫念惘瘳至於寢食俱廢且因四面分堵各專責成

伏讀

聖諭昕夕代爲默禱於

天以冀大功告成八人同受厚恩仰見

至誠感孚

訓辭深厚不獨將帥之臣倍思振奮報

恩凡在戎行莫不聞而起舞同心敵愾是以疾風掃

籜之助不旋踵而立效也

初三日

辛亥

長齡奏言前因徐添德一股復自陝

省東趨必當預籌防堵倭什布分帶官兵轉回

二竹相機堵剿

臣

同明亮孫清元乘勝追剿

臣

與倭什布分路後仍卽向南跟追該匪知官兵

剿逼甚緊不及西向卽由興山屬之公坪水月

寺馬湖山等處直往東趨所過並不焚燒房屋



晝夜疾馳一百數十餘里

臣

與明亮孫清元熟

爲計議該匪素稱狡譎現在行走俱非常路大山  
雪嶺溝深路窄誘我官兵深入以遂其下竄  
荆宜之計就此窮追不特難以得手且恐墮其  
奸計必得抄路兜迎是以改由保康之歐家店  
歇馬河入南漳之馬良坪通城河遶至遠安之  
荷花店於二十二日途次楊家大廟探報該匪

現竄東湖屬之陳家坪交戰埡一帶滋擾臣趕

至符家坪暫爲歇息於二十三日五鼓集兵進

發山峽甚窄馬步難行辰刻始抵廟埡見有瞭

探賊匪百餘名扼住埡口臣當派副將朱士奉

都司姜元祥帶領奮勇兵勇迎前仰攻埡口立

斃賊匪四十餘名該匪折回奔竄我兵緊向下

壓追至陳家坪又有賊匪三四百名吶喊抗拒



臣

同明亮孫清元率領馬步各官兵連隊而進

匪徒見官兵勢衆卽向交戰埡奔逃臣率領侍

衛等正在督兵追擊又見山埡伏賊一千餘名

突行衝出該處路通一線兩面石壁極形陡險

既難分路進兵尤難搶佔得手頗形掣肘臣當

與明亮復將官兵撤出峽口臣孫清元帶同遊

擊常德署遊擊楊安等率同廣西宜昌官兵由

集三卷之三十一  
五  
左手一路進攻臣明亮帶同富翰塔津保叅將

德興胥泗起等率領馬步官兵同知蕭與潔帶

領竹山鄉勇首領黃富元鄭光明等各帶練勇

由右手一路前進臣長齡率同副都統職銜總

管托爾托保侍衛呢瑪善徹布登副將王懋賞

都司高承耀督率官兵從中分兩路進擊正當

各路官兵搶至半山該匪分投下壓勢極兇悍



我兵奮力抵拒賊衆拚命抗敵亂石如雨自辰

至未相持三時之久副將朱士奉手受矛傷左

右勝各帶石傷都司胡俊鴻受矛傷五處都司

姜元祥受石傷二處俱各無妨千總唐盛高頭

頸胸膛脅背受傷九處甚重外委梁志光首先

搶撲力竭陣亡各官兵憤恨莫遏鎗箭並進大

礮轟擊仰攻直上立斃賊匪一百餘名生擒賊

匪一百五十二名該匪四路翻山滾崖而逃各  
官兵乘勝趕殺二十餘里沿途殲戮不計其數  
搶獲烏鎗三十五桿長矛四十三桿大礮三位  
旗幟二十六面騾馬五十三頭匹逃散難民甚  
衆時已向晚山徑甚窄難以前進卽於黑石壩  
駐紮當將獲犯訊供內任光萬楊尙年二犯係  
四川人現當衝隊先鋒最爲驍勇據稱首逆高



二是大掌櫃同王廷章楊一桂閔慎先俱爲偽

元帥有戰手一千餘人襄陽人多川陝人少新

擄二千餘人共有三千餘人高掌櫃商議哄誘

官兵入山險窄之處埋伏抗拒可得便宜總要

找尋小路令官兵馬力難施如能竄至當陽遠

安地面寬濶可以覓食度命等語當卽變割餘

匪劉正貴等五十三名訣俱打仗日久均卽正

法新畏男婦九十七名就近解交東湖縣查明

卹釋放回籍臣現探賊蹤仍卽緊躡追剿以

期迅速蕲事仰慰

聖懷再連日二竹一帶徐添德尙無竄近楚邊之信

倭什布於此間分帶官兵六百名並可就近將

臣留駐竹谿之兩粵官兵一千名馬隊六百餘

名歸併統領再於各邊卡抽調兵勇自可以資



堵禦此次兵勇接仗實爲奮勇出力謹分別開  
單恭懇

聖恩鼓勵其傷亡兵勇容俟查明咨部辦理奏入

上命軍機大臣傳諭長齡曰高二一股聞知官兵剿  
逼甚緊卽由與山等處直向東趨長齡與孫清元  
明亮等改由保康南漳一帶繞至遠安抄路兜迎  
分投截剿在廟垵交戰垵等處陟歷山險奮力進

擊共殲斃賊匪一百四十餘名生擒一百五十餘  
名此次打仗殺賊尙爲認真出力惟擊敗餘匪仍

翻山逃逸首逆高二未能擒獲尙不滿意該逆屢

次戕害大員最爲可惡卽長齡等亦稱其狡譎竄

擾三省同深憤恨尤當倍加奮勉督率官兵卽在

湖北境內將高二迅速殲擒遵照節降諭旨將該

犯首級致祭被戕之各大員以慰忠魂而雪衆憤



並將賊匪夥黨剷除淨盡勿留餘孽卽爲長齡等  
之功朕必加之重獎此時賊蹤距川省甚近不得  
僅以驅逼入山卽爲完事也此次帶兵員弁俱能  
奮勇內干總唐盛高身帶九傷尤爲出力已同其  
餘各員分別加恩所有殺賊陣亡之外委梁志光  
著照把總例咨部賜卹至徐添德一股現未竄近  
楚省邊境自屬甚好但楚省邊防尤應嚴密現在

倭什布已分帶官兵六百名並將留駐竹谿之兩  
粵官兵一千一百餘名歸併統領務須實力督率  
扼要堵禦毋使一名闖入倘有疎虞惟倭什布是  
問至高三馬五一股現在竄至何處是否距楚已  
遠與徐添德是否聯絡此數賊會否剿敗一經得  
有信息著倭什布長齡速行具奏

上諭內閣曰長齡奏請將打仗奮勇出力員弁懇請



加恩副將朱士奉著賞戴花翎都司姜元祥同知  
蕭與潔俱著賞換花翎驍騎校委佐領果與阿驍  
騎校委叅領同善防禦委叅領塔斯呼里把總劉  
得貴鄉勇首領黃富元鄭光明俱著加恩賞戴藍  
翎都司胡俊鴻著加恩以遊擊補用至千總唐盛  
高一員身受九傷甚重實爲奮勇可嘉著加恩先  
賞給守備頂帶遇有缺出卽行題補並賞戴花翎